

青  
芝  
山  
館  
集

青芝山館詩集卷第十八

臨川 樂 鈞 元淑

古今體詩

丙寅

元旦小飲二首

四十季光已醉過朝來小飲又顏酡家書幸報慈親健神語  
猶傳吉事多三世業緣文士筆一江歸夢釣人蓑從今春色  
憑孤負不問梅花放幾何

爆竹轟雷攪獨眠恩恩殘夜入新年歌聲漸到吹簫地風色  
寒於釀雪天虛耗可能今日逐聰明猶悔簪時鞭眼前只賴  
杯中物且拌囊中壓歲錢

夜往金陵與諸公痛飲爲別

醉中無所適夜出城南關登舟萬星暗淮水鳴潺潺適來正  
如夢把酒酬雙鬢停杯獨起立四座歛笑顏問我亦何爲往  
看金陵山良朋有心約千里行當還此行況短別記取新月  
彎夢中倘欲見相待梅花間

金陵常樂庵社日雪

社公覆手變春晴滕六乘機到六翼已放梅花都氣盡重來  
燕子恰心驚潮聲寂寞聽逾遠山影微茫看漸明未敢便思  
歸去路登樓且望廣陵城

次日又雪二月朔也

怪得宵來夢更寒曉天飛雪又漫漫豐年玉好終何用昨夜  
星多亦暫看行篋衣裳添已盡僧廚杯杓醉應難騎驢待傍  
三茆去江上鴻泥拂日乾

道中望鍾山殘雪

玉屏風外見朝曦，漸有人家出翠微。似醉似醒山欲語，時連時斷樹無依。英靈鶴怨知多少，形勢龍蟠果是非。雲際溶溶新雪水，青溪一瀉幾時歸。

送熊夢庵儀曹入都

淮水三季泯泯流，君行萬里此扁舟。新詩愴惻悲香夢，君以悼亡見詩舊恨蒼茫付冶遊。石室緣溪仙共語，蕪城春冷客難留。使旌若到江南岸，可向煙沙問白鷗。

題秦敦夫太史

恩復

梵寄小像二首

金粟長康法虛傳，阿堵神曾無人我。相偶現宰官身，幻影千潭月。浮生一竅塵，謝公多慧業。了了證前因。

未踏青梯石，同看白社蓮。燈光能見性，湖景可參禪。飲酒師

王側拈花鹿女前圖成到思憶猶作照行仙

魯南晚給諫丈

蘭枝

索題濟南濼源書院二石

鼇簪

一簪插地一千尺  
髣髴滄溟戴山石  
星娥沉醉雲髻墮  
入齊煙九點碧  
豸冠挂後絳帷開  
幾回珥筆思蓬萊  
我亦昔年遊海上  
釣鼇空讓謫仙才

鐵師峯

金精幻作毛羣長  
猛氣稜稜懾犀象  
千年蹲伏鵲山旁  
月出秋窗雷夜響  
軒轅白澤祥所鍾  
此石靈異將毋同  
鉤爪銅頭誰畫得  
更煩坡老贊屏風

飛仙引

白玉城中花一樹  
春風百劫紅如故  
潯溟海水接蓬萊  
變作

蠶娘採桑處倏爍二氣馳三光仙人見慣渾相忘竹帛鼎鐘  
文字朽一笑未盡花前觴昨來香氣飄雲下明月樓前駐煙  
駕畫沙妙筆風雨飛詩成字字通元化蔡經學道未辭家敢  
望擲米成丹砂凡情俗意消除盡可許蓉城埽落花

將歸臨川畱別揚州諸公五首

又是三年醉未醒還復歸關山仍莽莽霧雨又霏霏覆頂須  
漁笠隨身尚客衣滿腔知己淚小別重相離

客意分忙暇遊蹤有逸勞雲容晴自嬾鳥路遠難高樓笛吹  
秋氣橋燈閃夜濤揚雄非作達制漢反離騷

未到身枯日誰能不憶家感通慚蔡順恩義促秦嘉時以婦

遣人召歸雲護金光草風驚石醋花扁舟逢競渡何暇弔懷沙病老母

大廈方巢燕窮林獨哺烏終然是萍梗豈得老菰蒲錢費鵝

兒酒裘分鶴料符飄零雖半世吾道未爲孤

豪翰原同命絲簀亦寫情著花餘結習穿石久精誠集待編  
長慶書煩寄子卿故山風雨夜政自感雞鳴

潯節歸艫攄懷遣日借唐賢七言律詩韻雜用之義  
取相比匪能髣髴迄乎家舍時亦間作依次彙錄得  
三十七首

瓜洲晚渡用李公垂宿瓜洲韻

殘醉如煙黯未消斜陽空闊眼光搖去程熟似頻來鳥歸意  
忙於欲上潮海色斷時山簇簇淮雲濃處樹寥寥隔江行客  
須遄渡莫待中流起怒颿

常州逢競渡停舟東門遣人招陸祁生至與之別  
用廬子發競渡韻

不比湖州看水嬉近來喧寂兩忘機江鄉到處繁華盛歲事  
連年積蓄微幾曲大堤遊舫塞一聲小海怒濤飛閉門只有  
雲間陸卻上河梁送客歸

無錫懷劉芙初時客金華未歸用羅昭諫夜泊毘  
陵無錫縣有寄韻

惠山泉淪小龍團待與何人凭短闌偃月橋空漁火散落梅  
風起客衣寒拌教心事成灰可鍊得身形似鶴難君住此間  
仍遠出眼中雲樹各憂端

夜船用韓致光韻

近樹遙山一色蒼暑天涼夜月如霜風搖客舫籠殘燭煙淨  
神龕點過香何處樓臺鳴鼓角滿空星斗落衣裳獨吟忽感  
鄰舟語流卻思鄉淚幾行



早蟬用賈闡仙韻

水國花殘碧樹稠  
炎風吹與一船秋  
似悲似壯聽來乍  
將送將迎響未休  
飲露已虛高士腹  
蛻身須上玉人頭  
知幾莫遣蟬螂見  
翼薄聲高易取尤

過虎邱有觸用李義山和人題貞娘墓韻

客舟搖過酒船邊  
酒佐擎杯說斗川  
鏤骨已歸吳苑土  
瑤情空對石家筵  
新紉莫遣裁歌扇  
碎玉憑誰辦葬錢  
往日眞孃魂在否  
女墳湖月自娟娟

公子行用張承吉韻

江南曲岸柳垂垂  
前導呼船下馬時  
五色妓衣花不及  
一聲歌眼燕相隨  
狂招狎客拋骰子  
醉學佳人舞柘枝  
莫怪豪華驚耳目  
乃翁新占鳳凰池

促漏用義山韻

江濱殘柝有誰聞  
獨客無眠過夜分  
明月驟沉遙浦暗  
新荷漸入曉風薰  
長歌未了還須酒  
短夢難成盡化雲  
依舊青天停赤日  
一竿檣影蕩波紋

五月廿二日許青士玉年季厓昆季招同陳曼生汪邈樓屠琴塢及積堂諸君餞於青平山之小檀樂室琴塢出便面寫圖曼生署欸贈行因用白太傅西湖畱別及許丁卯遊錢唐青山李隱居西齋羅江東秦望山僧院韻畱別三首

扇頭書畫鬱雲煙  
窗外松篁韻管弦  
戒酒恰逢河朔飲  
浮瓜何減建安年  
當關催館將傳柝  
拍岸胥濤獨上船  
夜夢或來分手處  
青平山寺佛爐邊

故園門外野蓮開釣岸吟坡繡綠苔少壯流光飛石火生涯  
羽化到銀杯閒山且得詩人筦初地疑曾夙世來的是杭州  
幽絕處了無金碧浣樓臺

香草由來聚一洲羣賢共作白雲游醇醪氣可三年醉冰雪  
談生五月秋下筆都能驚老病著書且莫負窮愁相期借取  
黃生語豈有生才似此休

黃仲則句

桐廬縣用韋端己韻

秀絕溪山可結廬未知生計近何如人非許邁難餐朶路遇  
方平也賣魚征棹已煩早潮送好風仍許暮帆舒向來本是  
幽棲地不遣高城障碧虛

桐廬無城

金華與美初話舊用杜司勳途中逢故人話西山  
讀書早曾遊覽韻

把酒金華太守堂夢尋已過一春強檻前花竹何蕭寂江北  
雲沙更渺茫石性豈隨仙術變柳條猶比壯心長清風樓外  
風如火消卻芙蓉劍上霜

山驛用韓冬郎韻

東南舊路了然分細草長松亂入雲一屋轉爲沽酒店百年  
未過伏波軍馬蹄有跡逾時改蟬語無情逼暮聞小憩自忘  
身是客怪他行旅太紛紛

山井用方雄飛韻

炎曦赫赫透疎林小井一窺清我襟瀉壅不愁行路客在山  
猶抱濟人心冥濛盡日填雲滿空洞中宵墮月淡豈有長河  
濶千里古無人汲到如今

到家用朱慶餘歸故園韻

身居材與不材間。庭樹雖低未可攀。千里又歸緣母老。百年  
易盡少人閒。封侯有分難投筆。謀食無能恥抱關。底用移家  
風景地。門前已負好溪山。

夏日山居用皮襲美夏景冲淡偶然作韻二首

雞毛縛帚拂窗紗。松葉蓋棚遮日斜。鳴午一鳩長夏景。眠階  
雙鶴野人家。雨乾石礎餘苔暈。風颭筠簾見藕花。卻憶往年  
當此月。馬頭塵土出東華。

依山矮屋也清幽。惜少凌虛百尺樓。門外草深無客到。胸中  
雲活是天遊。周妻何肉雖爲累。讓水廉泉且暫休。修竹亦非  
容易得。數竿已自敵封侯。

野花用羅補闕韻

幾簇新紅幾簇殷。間林依草繡溪山。行人馬過慙慙見。遊女

車停欵欵攀何日燕鶯來管領一春煙露委空闌金鈴玉檻  
周遮處也自摧殘頃刻間

始聞秋風用劉夢得韻

流年無故日相催此是驚心第幾回身在故鄉仍夢到愁隨  
落葉又飛來牆頭山骨峻嶒出屋角雲容黯慘開未覺平生  
足騷怨如何容易怕登臺

得揚州諸公書知淮海水患消忘用王仲初聞說  
韻

桃花漲已奠三春竹箭流還怒水神淮海隄防原勢險魚鹽  
生計易家貧東南轉漕

人  
皇心切西北開渠吏治新賈讓王尊俱束手羨他江上弄湖

自覽少作用錢仲文暇日覽舊詩因以題咏韻

今情古事豈相關佳日窮宵一遺闕詩夢幾年遊物外酒狂  
何罪謫人間茫茫元氣誰收拾落落仙雲共往還若使寰區  
無五嶺窗中遠岫亦名山

山居野興用元微之放言韻五首

天地清秋入嘯歌管城三寸敵羣魔衣裳自愛芙蓉好庭院  
宜添杞鞠多華國文章原有數入山心事更無他少年已悞  
成今日底向西風喚奈何

水淺迴潭鷺踏沙此鄉難着釣人家雖無駭淚愁飄泊可許  
輕舟響札鴉一寸豆苗迎日橘三分梧葉墮風斜茫茫四海  
求安宅誰信吾生自有涯

江湖一棹往來頻萬斛清愁七尺身腳底魚鼈都作浪眼中

金石每成塵苔生破壁緣琴足風落虛簷動酒鱗獨立蒼茫  
聊自慰憐他停轡問津人

邛笮何曾許暫安寸胸鬱鬱起峯巒雲成蒼狗天將晚門唱  
驪駒酒未乾往日別魂消欲盡此生佳夢散無端歸來歲月  
非容易那得臨觴不盡歡

飯罷茶餘繞郭行鄰翁久別竟忘名名松已仆新松長溪草  
將枯淺草榮澗石嶙峋無世態山色忽似平生箇人弄水  
蓮塘曲彈作荷珠掌自盛

夢仙用韓冬郎韻

不煉還丹不采芝世間屈曲悔平時山中看奕緣應有海上  
乘橙計已遲紫府珠宮猶入夢青童玉女總相疑羣仙馳逐  
罡風裏亦墮塵埃未可知



寄題社館諸子用顧道翁閑居懷舊韻

偶向臨川守散廬  
笑薪祗粟已無餘  
文名漫享千金帚  
生計才尋九穀書  
諸雨人來都笠屐  
看山客見少簪裾  
尊前每博慈親笑  
此樂諸公恐不如

荅人問用司空表聖爭名韻

少日胸懷頗崛奇  
半消行路半吟詩  
悲歌氣到幽燕短  
抑塞情饒屈宋知  
生命已逢南斗厄  
名心何待北山移  
君才信美宜廊廟  
可許漁樵樂

聖時

廢宅用方雄飛韻

鄰家廢宅久裴裒  
當日朱門闔且開  
臥草猶奴逢影臥  
銜花燕子語春來  
危牆一段猶青粉  
要路三叉盡綠苔  
金碧灰飛

何足道惜他樑棟杞枓材

哭族兄愼徽用李嘉祐聞逝者自驚韻

君疾何曾弗可爲平生強壯自然疑貧交俠友心都死老母  
孀妻事夏悲賣屋餘錢供弔客傾囊故物謝醫師咎同總角  
今分手一夕驚余兩鬢絲

中年用鄭都官韻

搔手如今嬾問天自掄雙手惜華年任人交口譏頗米知我  
前身是瘦權半世已成松在澗全家仍借硯爲田誰憐不嫁  
黔婁女常與金娥翠裏聯

欲別用姚武功韻

霜天如醉月微茫轉過屏風去路長若有要言須說與夏無  
他故可甯將此時對面成孤坐今後相思付八行餘淚彈君

簾外竹來朝庭院變蕭湘

龍游舟中暮眺用吳承旨閑望韻

驚鳥飄風疑落葉斷霞隱岫似孤花山腰橫抹千尋練洲觜  
圓成一聚沙如此畫圖無妙手可憐煙水屬誰家  
柁娘慣有江湖樂日暮濃堆兩鬢鴉

聞門夜飲酒半欲歸用韓冬郎半醉韻

常筵聽罷紫雲迴隱隱城樓鼓再催  
鶴市冷風飄水過虎邱殘月帶霜來  
聞名此日猶懷杜門卒何人可姓梅  
我輩豪華真嚼蠟吳宮花草亦蒼苔

歲暮往揚州留別胡果泉方伯用張文昌蘇州江岸留別樂天韻

石坐雲霄我踏泥六年征路散輪蹄  
豈知李白匡山約重聽

嚴公駿馬嘶

庚申五月僕自潮州歸臨川謝別方伯詩云  
何時旌節移江左借看湖山買棹來之句

肝

隔見知常淚灑須眉無恙只顏低  
惓惓歲暮非輕別暫看梅  
花往竹西

丁卯

吳門紀遊雜詩十五首

中年情已傷勝地春則冶  
買鴈鴻家邊放棹虎山下  
桺條腸共柔水色心自寫  
千人正歡笑一士獨嘔啞

鳳開木瀆好欲買茆舍  
居湖山各有主風月曾無餘  
流鶯語詩木夕霧蒙前墟  
九州皆客土一畝斯吾廬

魚足登靈巖伸眉對巨浸  
山氣清水風湖光媚松蔭  
鹿去臺久傾魚繁網無禁  
埽石憩閒蹤折花供小飲

崑崙天平山尊嚴文正墓  
萬笏森堂階千季繼封樹  
鄰有尚

書墳亦禁采樵路流連隨會思慘惻江淹賦

天如種竹處元鎮疊石存巧偷蓬嶠勢盡化筆墨痕羣真會  
一宅微妙分千門隔牆卽塵土何地宜壺尊

吳市少曠土蔣園臨野田菜花映軒蓋藤蔓縈釵鈿賣酒水  
亭上煎茶土山前辟疆不逐客呂直原愛錢

古有傷心人今多把臂客氣同山月高眼對湖雲白旁人詬  
顛狂我輩自標格鄧尉花已殘支硎路亦窄

把劍臨劍池訪鶴迷鶴澗古刹入塵羅平橋儼雲棧花笑春  
已淡酒香日將晏燈火動哀唸煙蘿歸夢幻

首闕金粉場身葬煙花窟霸氣梧宮冷精魂羨門出鳥猶和  
豔歌山不受頑骨死生原等閒哀樂何倉卒

水有百橋東門常千艇過日高動柔艣風起無微波曲岸見

聯袂危樓聞按歌宴遊各未已常暫知如何  
平生耽俊遊所至多沃土茂苑尤繁雄閭門極華廡或歎讀  
書貧亦道力田苦樂事輸奴隸利權屬商賈  
重來依故歡獨恨失賢宰南園醉已醒西崦鄰猶在舊約應  
未忘新居各有待已矣收名疆最哉離宦海

仙人宋押衙舊事秦丞相冤獄覩冥誅還心越塵障忠姦事  
旣明彰癰疽理非妄可憐城市人誰識鬼神狀

山川王霸餘財賦東南冠吳越初睹碁錢楊屢飛彈地富人  
必爭風柔勢易渙運會久隆平封圻轉強幹

流寓足耕釣古賢多英靈遙遙天鏡閣的的滄浪亭近郭正  
新雨故山無此青有書闕林屋何日窺洞庭

題衢州徐設甫明經

世傳

煮茗圖

無端墮地食煙火只有烹茶味較可少年嗜此今等閒滿氣  
漸滴非故我但知杜康能解憂日飲無何意未休瓦鼎花瓷  
都冷落輸君換骨比丹邱

訓袁湘湄徵君棠見贈韻

笑我如枯管逢君似異書能詩臨汝舊對酒蜀岡初蹤跡看  
檣燕生涯付硯魚因風問郭璞頻行色近何如

題徐館舊蓄四鶴其一余所最狎每醉後月下對之  
舞鶴亦鼓翅見向或他去必與拱手言別頃自吳中  
還則此鶴爲敲闌所壓折其一足余曰往時之伏地  
引吭喁喁相訴爲之流涕故作是詩

平地伏險塗高霄限窮翮壯心雖遠舉奮足已奇厄狎摧叢  
樹隨身墮危闌側員吭變清唳華頂翳丹色憶簪庚申冬重

來大江北見爾如良朋知余匪俗客屢舞何僊僊暫離每惻惻合氣忘形骸同羣遜標格趾高步常矜脛斷事不測傷哉年命衰信矣樊籠窄

數日鶴竟病死瘞于後圃復以一詩悼之

窗月滅凝素園松餘古青仙禽委羽去羣鳥環樹鳴託身自九皋閱世疑千齡既嬰鵲鷄網詎躡鸞皇翎長生況天忌大患由數丁安危判俄頃精白歸杳冥往誇明遠賦頗驗浮耶經今思薛稷畫載續華陽銘瑤池失故路華表無歸聲三生諒難見萬物空有情

次韻白庵畱別卽送之歸南城

卅載西風一劍橫論交終失孔方兄君今潦草收前局我亦疎狂誤半生歸向故山調野鶴夢回鄰寺吼華鯨石湖縱有



閒田地待與何人共課耕

白庵有石湖課耕圖

酒後復次前韻

酒器紛紜畫筆橫每呼陸弟喚殷兄  
衣冠在側都平等風雨相思半死生  
未必棲簷隨眾雀誰能拔劍斬長鯨  
時哉莫歎歸田拙自古賢豪事力耕

題袁壽階上舍

延壽

移家載書圖

東家樓閣何煌煌有金銀氣無書香  
西家車船載家具知是何物充囊箱  
書生性癖獨可笑坐擁圖籍誇富藏  
架插萬軸胸萬卷瓶盎乃無三日糧  
吾友袁生正如此又好結客頻傾囊  
篤學平生嗣伯業名流交口推中郎  
城中大宅遂懸券退守老屋楓橋旁  
李謚棄產有不惜張華徙居何所將  
當時標韻足傳寫牙籤錦帙裝吳航  
裏出一圖選樓下垂虹貫月搖

西塘自云青瑣是故物遠映紅蕙畱山房詩贈所居有紅蕙山房買書而貧貧復賣至今何止三篋我亦因之念手澤閒齋飽蠹遊塵牀行幃故紙賸幾束飢不可餐徒壓裘治生始感魯齋語焉用挾冊亡臧羊香山粟廩對書庫二者兼營宜不妨要之物理聚必散墨莊金穴俱難常爭如浮家事釣艇盡除結習相徜徉

梅皋刺史丈挽詩二十四韻

公似香山叟人稱玉局仙身存諸老後事記

兩朝前位業真靈降聲聞壽算縣攢眉傷物態抗手謝塵緣  
咎夢辭蓬島讐書上木天尋懷典州印屢著諭蒙篇李代因  
桃啗松高任葛牽琴聲迴日照劍氣豁星躔盟笠堪千古抽  
簪又卅年榮恩推石舊舊德姬章賢忝結郎君契曾叨長者

憐憫遊隨杖履疑義析丹鉛魯殿今摧矣函關遂黯然方瞳  
神化月遙躅氣排煙章貢滔滔逝魁杓落落懸鄉邦失黎獻  
言笑隔幽卒治縣傳家譜居官泛海船鐵驄橫見絡瑤鶴老  
驚弦風靜舉魚痛園荒靖節旋森階餘讓木注井竭廉泉道  
廣名方盛門高慶自延羣情俱瑣屑片刻有推遷冷看升沈  
理微叅夢覺禪西州幾行淚灑向怒潮邊

荅章大二首

暫醉東城舊酒家一般聚散感搏沙渡江揮扇情原苦過市  
吹簫路又差墨翟回車休悵望郎宗賈卜豈生涯我行亦趁  
秋風起不待天寒落桂花

怪底官貧勝客貧憐君詩句寫酸辛辱誇絳帳羅高第終愧  
綈袍贈故人瓜步風多潮似雪梧園苔厚雨如塵交遊莫信

陳平廣門外無車已浹旬

樗園長夏卽興成詠十三首

主客散已久淹留計獨非  
綠知湘草盛紅到蜀葵  
稀暑路愁張繖閒園借掩扉  
雖無幾日住聊得避炎威

藤古牢蟠戶榆高巧覆檐  
微名收劍匣躁性養菰區  
說鬼奇堪快誇官俗不嫌徐  
公通且介差覺近能兼

密樹微風阻荒池積草浮  
雀喧常墮瓦魚小不勝鉤  
冷趣藏城闕囂聲隔市樓  
無煩軒蓋枉一刺要還投

虛明得臥室俯仰似遊艘  
綠竹左交砌紫薇南映窗  
客便常坐久我靜覺愁降  
稍惜飢蟲盛雷聲繞夜缸

散髮忘形侶消閒引睡書  
剖瓜蠅絕處淪茗燕回初  
滑簟鋪苔甃涼衫搭綺疏  
不知華屋裏行樂復何如

游樊廬長夏無雲望雨難江淮諸郡歉鹽漕兩渠乾轉運須  
神力焦勞是好官往年河伯怒水國太瀾漫

吳伶夜調笛斷續隔東牆樹杪星衢靜蘿陰月地荒流螢如  
客少瘦石比人長守寂由來慣三更尚繞廊

花面園丁女蓬頭市正兒繞階尋螻穴穿屋罥蛛絲厯厯童  
年記恩恩去日馳天機猶自發不訥爾曹癡

酒香湖岸店風引水門船發興常因月聞歌亦采蓮笙簧當  
要路燈火門開錢於此觀人事何曾遜往年

弱柳都搖影新花稍識名曰長鶯語倦風燥蝶衣輕巧笑逢  
溪巷閒愁散滿城廣陵舊琴曲改調和箏聲

蟬聲晚逾縱暝色賸高松霞照西靈塔風傳北固鐘江波迷  
九派山霧杳千重更覺鄉關遠徒令歸興濃

涼時挈小奚巷北復街西餅向孱童買詩尋冷寺題順煙通  
鼓角微雨雜塵泥夜市揚州遍無愁歸路迷

忽忽驚秋近乳乳了夜淡露思慈母淚星炯故人心嚙語僅  
方麗煩憂我自箴不知晨鳥喚疑是候蟲吟

六月廿一日小石上人招同諸公於平山堂爲歐陽  
文忠公作生日余以苦熱不往爲補此詩寄荅小石  
兼柬諸公

宴客有花復有妓風流太守歐陽公豈獨文章七百載堂下  
芙蓉今尚紅山僧殷勤埽逕苔爲公生日齋廚開火雲燒空  
水風熱客欲酹公公詎來知公不來我不往獨對清尊結遙  
想一江潮汐蕩心胷兩點金焦落指掌壁間懸有焦尾琴爲  
公重譜醉翁吟還將此意傳知白一和泉淙石亂音

調胡香海司馬

森

方外有司馬病中如嬾雲罷官不見客非我孰知君跡混鴉  
鴻侶心遊麋鹿羣猶愁灞陵尉終惱故將軍

書題稔館記後寄東賓谷廉訪楚南及同舍諸公四  
十韻

後彥低徊處吾曹聚散場文游雖歇絕圖畫已輝煌往闕招  
賢館羣稱大雅堂地當淮海要人坐斗牛旁名埭遙橫檻隋  
堤曲抱牆圃浹花四序樓迴雁千行縣最無煩設纓蘿亦兩  
忘慕韓爭捧袂禮謝必傾筐暇日搖青管明霞絢縹囊門奇  
陳簞扇流韻入絲簧故事閒閒續佳辰緩緩觴探幽過月觀  
平古問雷塘鷗性水邊野馬蹏風外香漫勞街帖報誰趁寺  
鐘忙夜吐虹霓氣春舒錦繡腸主賓追范陸酬唱軼裴王賀

燕隨舟旆蟠螭換印牀仙官爰拔宅吟侶盡攀裳東府冰綃  
黯西窗玉燭涼遣情猶筆硯移步卽滄桑傳舍今城北亭池  
白日長秋聲變府樹客夢蟻邱壘憶簪承高蓋頻年似故鄉  
儘客中散嬾時發次公狂飲伴愁相慰名心寂不颺笑談看  
電火夢寐了星霜的的尋詩逕迢迢聽雨廊記畱蕭子範書  
勒米元章輩障憑新易標華爲底芳傳聞官閣冷安問選樓  
荒鶴本蘇耽化琴非戴逵張金颺凌楚葛水調咽吳航勝會  
杳難再良朋各未遑汲泉傷苦井營壘念空梁悵別曾紅藥  
牽懷魚絲揚湖天雲悄悄江路草茫茫滯跡如碁置微才論  
斗量一生能幾屐何物是歸裝檐竹疎交翠庭梧颯墮黃眼  
前榮悴感聊寫寄衡陽

別香海



逢君病後常堅臥，歎我情多每痛箴。冰雪冷消長夏景，雲霞  
高映簪年心。酒邊雜感多閑筆，花外清談似古琴。紗帽布衣  
同懶散，平山堂下碧江深。

留別王鍊舟

灝

小園高樹過涼風，略與貧交氣韻同。靜不沈枯真野逸，窮猶  
慷慨是英雄。微嫌酒量才三葉，莫忘花香尚幾叢。淮海舊遊  
星散盡，我舟明日又江東。

八月吳中得家信云以十月之末移居來吳

客身歸復出，老母許移居。計決年荒後，心飛信到餘。此邦仍  
傳舍，何處足田廬。鄧尉梅花發，聊堪奉板輿。

暫假臨城宅，空餘挂杖錢。望衡欣故侶，謂廉貨廡愧前賢。家  
具琴書止行期，雨雪偏山川。如可縮明日，候來船。

夢中得前六句覺而足之

七尺風簷捲水開振衣恍惚在高臺城頭暮色烏啼盡塞上  
秋聲雁帶來矯掌遙承仙露滴側身斜拔帝桑栽詩魂卻趁  
鷗車返一院黃金墮綠苔

題奇女圖十二首

并序

廉山屬姜曉泉畫凡十二幅余以爲未盡姑就所畫者題  
之他日補畫亦補詩也

聶政姊嫫

嚴俠之仇何曲直政身許人嗟可惜韓市腥風皮面開千人  
萬人莫相識姊嫫不詈哭失聲自殺以揚吾弟名軹渌井里  
一死士遂軼賁育高成荆兩腔熱血爲人濺義俠千秋同一  
傳文姬憲英寧不奇骨肉他時尚相見

如姬

虎狼瞋首邯鄲城公子欲援無寸兵援兵何屬屬晉鄙晉鄙  
兵行蕩陰止姬也懷恩報公子夷門監者爾知己兵符一出  
秦師靡平原走賀信陵姊吁嗟趙魏本唇齒趙亡魏乃旋踵  
耳微姬之力事危矣朱亥有椎不得使李談至計徒爲爾魯  
連亦蹈東海死

馮夫人嫖

黃鵠悲歌思故鄉楚主更嫁烏孫王赤谷城邊少青草漢家  
奇女獨馮嫖嫖乃侍者稱夫人錦車所到尊如神長羅都護  
借顏色大小昆彌仰威德一節賢於十萬兵奇功合勒燕然  
銘不然和親豈堪恃肥王狂王烏獸比枕席終變爲疆場半  
年出塞勞破羌

馮昭儀媛

殿外老熊攀檻入殿前健仔當熊立勢如虎突馬鞍驟情比  
隨街左驂急廣陵從幸勇何加司馬上書忠不及膽智方知  
將門女勛勞合賜延鄉邑嬖倖由來喜傾陷賢明詎免遭讒  
嫉巫蠱重銜史娣冤髡鉗幾傳戚姬律可憐中山飲藥時正  
是永信稱尊曰玉棺不耐孝元陵青塚明妃同掩泣

木蘭

女娟操楫代父死緹縈上書代父刑木蘭事跡更奇絕買馬  
替耶從戰征壯女一軍古曾有牙旗玉帳圍花柳幾見蛾眉  
厠虎牙十年沙漠聽刁斗雄雌雙兔傍地走火伴無人識誰  
某可知奇孝必奇才搏弄羣兒如土偶功成不作尚書郎明  
駝千里還故鄉庸奴微勞挂尺籍乃博金印希侯王簪讀木

蘭詩今對木蘭像不畫紅妝畫黑衣酣戰英姿猶颯爽黃河  
黑水天蒼莽羽箭禁風作寒響

洗夫人

江陰旣禪陳都督又報高臺館獨足迎降雖奉故君書犀杖  
重還堪慟哭石龍舊帳喧笳鼓譙國新符開幕府自言忠孝  
本家風一心謹事三朝主庭前金篋示子孫繡幃輝煌錦繖  
尊幾人功業係終始愧煞男兒生將門笄年信義結鄉閭白  
首威靈制亾叛合拈金管補瓊碑略比錢唐表忠觀

紅拂

城頭吹角侯門閉逆旅紅妝騎馬至楊素老姦神鬼驚美人  
料爾尸餘氣紛紛去者無人追妾計已詳君勿疑君不聞  
閨中放樂昌主擲刀不斬李重規絲蘿自擇喬松托不比楊

花亂飄泊他年墳闕鐵山高笑煞西陵對銅雀最憐雄服行  
息息慙髮又制虬髯公顏貌如花眼如月似較夫婿尤英雄  
簿籍堆牀付一妹此事有無姑勿計奇才要勝當壚人未要  
王孫子僮婢

平陽公主

竹園亾命隨金鼓繡甲紅韉氣如虎指麾關中七萬人來與  
郎君對幕府密謀初出晉陽宮千牛間道迎阿翁郎行聽妾  
自爲計神劍何必論雌雄亂離骨肉難相顧嬌小魯元而雍  
樹朱履空畱寶鏡分瓊華玉葉依零露娘子一軍前代無錢  
歌送葬恩禮殊巴陵亦作柴家婦死坐嵐州愧乃姑

梁夫人

披榛斬草立軍府織薄編菅勞內主又向江天槌戰鼓白日

驚雷雜飛雨八千壯士拔旗舞鐵纆大鉤沈萬牖頭冠狡獍  
氣熊虎絳袍玉帶走如鼠中興諸將多奇功命婦佐軍誰則  
同況乃拔身羅綺叢自博兩國夫人封往時見虎蹲廟中騎  
驢末路嗟英雄仰看湖上雙飛鴻開簾一笑藏良弓

奢香

女子開邊前有誰明初水西宣慰妻宣慰之妻襲宣慰奢香  
之才勝靄翠首戴天朝如意冠身專閫外將軍制指揮梟橫  
激諸羅四十八部齊操戈手捧勅書對眾語仇雖可叛如恩  
何恩不可叛仇可圖祕計夜商劉贖珠請率蠻兵遠叩蜀但  
求君王誅老奴仇頭已隨革帶斷西南粟馬如魚貫青松萬  
樹隱金椎哨家舊位何足算君不見無敵天王擁女戎十年  
戰血雜邊烽若非建旆龍場驛未免窮兵馬尾籠

秦夫人良玉

寶鈿花釵金鎖甲星眸淚滴芙蓉匣書手能傳忠勇心不徒  
凌煙羽箭插笥見夫人宮錦袍袍花綻裂磨弓刀少白山人  
夫人高孫居南昌已黃土遺衣化蝶今何所夫人志業真天人可惜  
擊肘遭庸臣血滿三川救不得播黎諸峒皆賊塵毀冠裂帶  
軍門哭誓從賊者罪必族晚聞一事應開顏賊胷洞貫吹簫  
竹吁嗟乎名將忠臣并節婦美人才媛復壽母銘旌大署總  
兵官巾幗如斯千古難

費宮人

中宮殉帝帝殉國昭仁殿裏娥臺墀都尉呼天無寸兵宮婢  
畱身殺渠賊身非公主賊豈知爲賊耳目伊其誰不殺自成  
殺羅讓恨事何減張良椎彤史倉皇失名字人殊花蕊姓則



費芙蓉一劍不空飛毛面絳頭皆奪氣御河流水塞花鈿青  
霞豔骨隨飛煙智略雖減名節全瓊霜玉雪飛愁天闕小紅  
耶馮小憐忍抱琵琶彈別船

家屬至錢唐同遊西湖晚抵武林門登舟作

臨安山水真金碧不能亂人天合工巧氣脈自聯貫元冬霜  
霰餘累月絲簧斷移家此經過取路暫遊觀荷空水鏡明松  
茂山屏煥石不礙亭臺雲堪補幃幔仙氣滿巖幽佛身倚天  
半鶻搖堦影飛鴉觸幡竿散清梵悵虛聽妙香佇靜翫慈親  
禮像頻病婦登樓便騎檻嗤兒悠繞廊訝婢竄宛轉歷精藍  
喧囂隔屋聞歲暮信蕭寥人稀足伴與按月認花神掄年數  
羅漢野雀恣遙窺寒英發微粲言遵南屏麓旋越西陵岸勝  
地忘天涯前程迫日肝迴睇湖煙送側聞城鼓喚平生浮梗

如符屬擲沙判何意爲此行儼然獲今段憶昔攬景初維時  
陽春晏花隨歌舫流霞映遨牀燦失志燕市還養疴段橋畔  
暑雨濯金繩秋風響銀蒜爾後江櫂停時遭隄柳絆黃鶯筍  
既燒金鯽魚曾爨雖偷尋賞樂終切羈孤歎違鄉非本懷泛  
宅亦良算酒共全家酌月如故園看梅鶴遜林逋蘊鱸羨張  
翰

移家至吳門借居楊仁山觀察思永葑門別業得詩

五首

浮家忽到五湖旁暫借花溪舊草堂未仕東坡難請地無心  
南郭任連牆倦遊身似蠶眠熟流鴈情如螳旋忙它日兒孫  
祭初祖尋源應配水仙王別業在葑門內水仙廟西

久鏹銅餅汲井泉新泥土鏗發廚煙寒當葭琯飛灰日以冬至日

入歉到藜羹代米年茂苑花闌霜滿地平江水涸石爲田疎  
正欲悔仍嫌晚已盡長門買賦錢

遠涉江湖累老親如今眞作異鄉人愁看杞梓懷兄弟夢繞  
粉榆就比鄰藏酒且謀終歲樂典衣更比在家貧何年歸壻  
東岡墓閉戶長爲息偃民

八扇明窗俯碧池幾重遙嶂接青芝客來每歎幽居好人懶  
聊耽靜境宜元豹骨高奇石背白龍鱗大老松皮百年何處  
非羈旅蒔竹栽花未厭遲

潁水鍾山蹟未磨歐王如此我如何飢烏失樹還尋樹旅燕  
離窠更作窠簷挂半規西崦月視分一滴太湖波不知林密  
雲淡處可有神仙張志和

金轡庭秀才

錫爵

招作消寒會分咏吳中古蹟得事

諸巷

臆開胃斷亦何爲刺客專諸事最卑義闇君臣非豫讓才論  
伯仲或要離魚腸逆理羞良劍熊背殘骸裹敝帷誰與斯人  
傳故巷闔閭臺殿總荒基

小除貧園獨坐

凍禽絮曉窗白日蕩寒照歲暮傷哉貧振衣發長嘯羣生累  
口腹志士惜懷抱閑增叔夜嬾窮長退之傲時運物所下性  
情天莫料敢云富貴忘正食迂疎報小空靜可坐荒池冷難  
釣仰看松色明獨對梅花笑

青芝山館詩集卷第十九

臨川 樂 鈞 元淑

古今體詩

戊辰

元日

雲陰彌震旦天意釀豐年

俗以元旦天陰爲有年之占

晏起寒差減新來

俗未便疎花畱老樹冷雀闌春筵從此須晴暝重裘是酒錢

送胡蔚卿孝廉

承光

赴公車

條風振秀甲快雪催早晴之子躡雲履良辰遊玉京手持五色管目睇三辰旌金鉞鑿混沌紅硯陳延英射策子昇少投詩文穆驚髮光映日綠袍色當花明燕郊試駿馬吳苑唳新鷺泥金佇官閣奪錦還津亭咎我滯九市識君才六齡靈關

發性鑰華氣充書城嶺海繼相見文章歛已成鵷雛旣異采  
驥子必先鳴一試擢高解羣才動英聲儒門況詩禮世父方  
簪纓謂果泉方伯水順舸艦疾山高松桂榮定符蒼石夢不爽青  
錢評鄙人本邱壑妄意窺蓬瀛倖充穎陰賦屢赴洛陽程萬  
辟遜利劍十訣輸金梓蠶鹽日以困楮墨終無靈倏忽負壯  
齒依違失榮名仰慙國士譽俯愧幽人貞

聖代口率廣主司心秤平秋蓉豈有怨野鷺何所爭濟時俊  
傑事守分庸愚情君爲揚髻鯉我作掉尾鯨對酒寫我臆臨  
河送君行寄言謝朋友努力成公卿

題廉山所藏盧忠烈公畫像

吏才小試臨清倉賊膽先落青龍岡一身旣作八州督羸兵  
懦將皆激昂五明驥足平天下屠戮狼羆如犬羊主勦主戰

氣勇決議兵議餉辭慨慷是時君心頗倚任淡知將畧公所  
長惜哉三賜上方劍不斬中樞楊嗣昌明公大半坐此賊不  
然國勢猶可張公少讀書每色舞慕岳少保張睢陽賈莊一  
戰成素志麻衣裹血還疆場公之忠烈皎天曰姦倭寧能誣  
國殤公生三十九年耳白首勛名誰誦公死六年明社屋  
公身所繫真金湯史稱公貌臞而皙獸骨膊可千人當平生  
善射亦天性每挽鵠血先旗槍敵矢著面還射敵歸來拔鏃  
神揚揚桃溪湄隱訖未築遺像幸有孫曾藏焚香再拜展撫  
本靈風肅颯吹嚴霜意必虎頭復獲臂乃如鵠峙如鸞翔褒  
衣博帶執卷坐雙瞋炯炯垂星芒丹青未解狀神勇子長何  
疑張子房

滄浪亭口號

野雲閒散老松疎淡處倪迂畫不如水石買來千古在鶯花  
晴又一春初詩情宛轉宜吳體酒味清醇似漢書我亦浩歌  
狂醉客此亭東北是蓬廬

花朝赴郭頻伽

趙艮甫

晉園

之招集碧城行館以

暗水流花徑春星帶草堂分韻得堂字

少時惜光景佳日常顛狂耳聞鶉鳩喚心若蝴蝶忙種桃不  
盈尺刻影驗短長一別花已稀再歸樹乃偃情懷既老大時  
節無豔陽攜家置茂苑風物勝故鄉欲借佳麗地使迴枯寂  
腸半春又虛擲百事常坐忘小園黃白梅開盡不聞香玉蘭  
亦將放始一循虛廊綺懷頗復動俗計旋相妨有如拂几塵  
還值塵沙揚又如覲施旦忽被屏帷障連朝屏瑣屑對酒頗  
激昂蟄蟲尚蘇息羣卉皆句芒奈何粘壁枯不作隨風翔良



月長梅雪招我遊山塘雖辭鼓櫂遠甚願開尊常虛明得仙  
節美誰登選牀庭花應芳序街月留餘光人心自通蔽物趣  
何顯藏忻戚不竝赴囂靜難兼償歲月少閒暇江湖多渺茫  
吾曹各慙慙此日猶堂堂

揚州旅次題壁三首

盡日和衣醒復眠麴生來索杖頭錢東門有船不可泛榆莢  
雨中曉杜鵑

已過上巳又清明花落新城更舊城聞說韓嫣狂欲死彈丸  
無故打流鶯

一路青篷聽雨來魚鱗窗扇幾曾開如今客舍如舟小也只  
凭窗看綠苔

清明雨中作三首

客遊逢漏天雨歇還復作渡江幾一旬未見陽烏躍溼霧蒙  
砌苔低雲壓檐雀螳經窪石沈蝸上滑牆落去年遭旱渴望  
雨如漿酪蓄氣滿江湖今來注溝壑嘗聞清明晴二麥庶有  
穫施澤乃違時天仁物已虐米價本高昂民情更蕭索豈惟  
羈旅愁未必官司樂

寒食新煙生在春亦云暮奴子暫告歸言當埽墳墓使我驚  
且悲泣然獨西顧舊隴迷松楸新阡濡雨露吾家承祖訓排  
日治祭具遠祖暨近宗本源遞追溯子姓會酒食丙舍分牕  
昨客子今移家何由展哀慕臥聽廣陵潮又隔閭門樹麥飯  
遜居人鵲聲感行路

庸衆豈有情賢豪每自喜相遇不相能有如石激水露草輕  
霜松潛虬避鯉鯉順逆無兩合窮通亦交鄙不逢奕棋仙誰

顧採樵子蕭允托異代虞翻望知己剪燈光不長沽酒味難  
旨眼中一掬淚灑入簷花裏客館傷高城危樓闌喧市志士  
莫長嗟古人未爲恥

題方式亭同年

楷

四十小像卽送其需次江右

與君同年貢太學又客南昌相公幕傾杯沃雪夜釭寒撼節  
倚風暮雲薄君今作令我猶客鴻鵠由來勝燕雀春波綠上  
垂楊堤絮別不知管絃樂朝來示我舊圖像玉光山翠發頭  
角我亦同生丙戌歲鬢毛枯短迎梳落著書心謝雕龍奇學  
劍臂輸白援弱逝將買艇釣魴鯉閒得凭樓看鵬鶚今君投  
檄向豫章西望江雲隔廬嶽鄉邦旣幸得賢宰風土應爲說  
崖略士圃方隅少奔競農安閭里畏敲扑猾吏頗能欺閭官  
貧兒亦常採富橐葵民第一數擔匪

羣丐相聚行竊各攜囊裏名曰擔匪千百

連肩走邨郭昭武建武瓜蔓延如薪已積火未灼姦蹤穴跡  
難究詰役詐兵疲懶擒捉流徙自緣生業空愚頑或須條教  
約儒術吏才君所兼定取醇醪細斟酌我雖泛宅石湖上歌  
頌猶能爲君作并煩寄語舊遊朋七年苦憶滕王閣

咏詩薇醪醪各一首爲人書扇

春歸已分不尋春一架柔條又惱人香入晶簾能醉骨笑牽  
羅袂要回身垂垂暮倚紅牆嬾脈脈愁拈翠帶頻莫更含情  
泣幽素樊南詩客早酸辛

雲香雪豔趁春遲柳妬桃慙百未宜弱骨強依風外立病顏  
嬌向酒邊知小名共擬殊多事高會相憐定阿誰二十四橋  
明月好霓裳舞罷蹙雙眉

浙江提督壯烈伯李忠毅公挽詩五十韻

飛飛樓船將煌煌竹帛名風霆搖海色甲馬墮星精早列勾  
陳位諳圖太乙營澗跳三丈闊弓笑六鈞輕分閭龍邱壯投  
鞭象浦清承恩加節鉞立誓埽滄瀛岸對魴潯遠波連鮪  
峒傾逋逃多豕突嘯聚必狐鳴大吏常寬網羣賢未請纓任  
施交趾檣難渡夏陽罌公至修戎政機先燭寇情水犀俱勇  
敢陂鵠豈檣撐甘茂私金重夷吾素賞明帆開妖霧豁箭拂  
亂雲平敗葉吹方散殘芽翦又萌乘潮工伺間失穴詐輸誠  
颶母頻掀艦鯁人或弄兵恩循交固結汎滿勢猙獰肘腋潛  
相扇咽喉險屢爭磨刀蒼屹石振瓦赤嵌城檄到提戈起身  
先破浪行醜徒殲月窟歸夢穩洋更謠諺知王濬威靈此彥  
卿鈴音姦宄肅畫像鬼神驚

聖主嘉勞績非常賜顯榮元謨邀鎧帽陳寵得椎成列鎮從

要約奇才備使令青霜寒拭劍白日迴懸鉦攝憤創猶裹操  
騶技各呈抗歌咸氣烈占易每師貞再出雞龍島親攀虎豹  
旌重溟天鏡澈萬壑水簾晴竄獸窮寧門游鱗困待烹安流  
偏踰蹬狂颶驟旬旬逐大遭回齧驂虬竟上征九還化飛猱  
一劫廢全枰未究緩邊略空戕命世英斷穿知極恨髮植有  
餘勅百戰如風雨孤忠徹死生今來悲化鶴誰爲斬奔鯨縞  
素三軍哭香花四路迎飾終蒙 曠典頌德遍歸程蔭獲通  
侯爵勛彰太史評沔陽頒特祀廬岳象新塋禾嶼盤渦激輪  
山怒石橫士懷偕作志魂佇凱旋聲 泰隆隆千紀威弧震  
八紘獻鵝爭欸塞佩憤總歸耕絕嶠雖偷活元凶久貫盈冲  
霄神爽在卽看隕欃槍

銀河三首

練橫繩直亘丹霄水氣金精斷彩橋見說阿環顏色替誰憐  
織女夢魂遙白榆錢散風猶急青鳥書回霧未消下界分明  
看徹底寥陽高視可迢迢

南箕北斗判津涯環住星辰幾萬家素女遠藏螺殼穩紅牆  
中隔雁行斜何人許濯飛霞佩無路能通貫月槎爭似武陵  
溪洞好平流春水送桃花

未必河聲總向西高空底物是金隄澄清自共雲容澹宣洩  
終愁海路迷隱隱旌旗過曲渚遙遙碁枰感淡閨會須直下  
三千尺已傷晶簾挂處低

貧園四詠

青芝山館

舊隱荒蕪林壑問十年夢繞青芝山琴書今置葑溪側遙借

山名爲館顏故國他鄉皆傳舍鵲巢猶幸鳩能借爾此看花  
知幾時呼僮且整薔薇架

四松十三桂草堂

果松落落叢桂幽白日空階濃翠流畫叉筆格綴窗几紅斷  
夕陽簾未鉤欲藏此屋寥天上白鶴蒼虬許來往性懶形勞  
到亦稀西風夜拂琴絲響

影心亭

亭下曲池天湛湛我心當以止水鑑凭闌隨意數遊鱗六鑿  
虛明萬緣淡風紋雨暈亦迷茫曾有一鏡涵空光欲挂雲帆  
濟滄海少年意氣徒爾狂

賓靈閣

雲窗開閣生晚風屋角七星光朦朧薜衣蘿帶影凌亂有誰



拜月煙叢中疑信相參傳說久神仙樓居事或有同是焦蚊  
蟹蛄緣歲時分酌一杯酒

中秋月下十二韻

夜色晴千里全家坐月明品茶消薄醉吹笛暢遙情檻露微  
微溼爐香靄靄橫水凝蓮萼嫩風接桂花輕節物依吳俗鄉  
思寓楚聲巷喧游女佩街賭伎人箏踏影叅元箸尋詩想碧  
城銀潢低脈脈玉漏遠丁丁撫序皆飄忽追歡少合并社催  
梁燕悄秋引塞鴻驚負米心仍急搏沙計暫成客中論樂事  
今段冠平生

九日

晝暝黃花雨秋寒白雁霜  
鯨心甜勝蜜蟹性冷宜薑  
諱病酬佳節承歡慶異鄉  
醉歌慈母笑道比少年狂

題盧湘艦大令

元璚

秋浦歸帆圖

西風浙浙官槐響江上鱸魚汭潮上琴牀攜去印牀拋一鶴  
梳翎伴歸舫高堂祿養鮮且肥未免束帶妨斑衣油油陔草  
迎春茂冉冉山雲遮夢飛維駒臥轍亦何有笑指翔鴻與分  
手蘆簪搖花寫放歌蒲帆挂月沽清酒近來小住康山顛俯  
看江濤接海天夕陽明滅寒飈起多少中流未泊船

書窗夜話戲作遣悶呈朱蘭實

徐

吳青士

雲

人影殘燭花舞酒闌津津作豔語雪逼熏爐聞妙香舌端  
幻出嬋娟女陶家侍兒工煮茶雖輸太尉猶豪華孟六鄭五  
乃寒骨瘦驢兀兀尋梅花自分千人愧前哲青囊一卦豈能  
決窗外東雲行復開未容庭竹蕭騷折

立春日發揚州渡江至京口宿萬浣雲大令縣齋

疾病辭廣陵帶春入吳甸雪霽岸容舒風調江勢便一舸低  
觸頭三山粲迎面林寒聲不振石瘦骨如鍊何知歸計遲但  
感年芳變性匪橘柚遷身饒鴛鴦先白日淒已馳朱霞散猶  
絢環城建旌旄列館駐輶傳正有巡行使來開參酌院地主  
亦云勞交情彌復眷許供鄭驛馬叨飲郇廚膳頓忘行路難  
翻益臨歧戀

己巳

人日大雪作歌遣悶

茂苑春寒梅未花羣英結軫趨東華觸塵蒙露恐獨後人亦  
催我登公車開籠笑飼剪翎鶴仰樹倦看銜尾鴉雲行不行  
壓樓楯日落未落昏城闌今晨臥聞響淅瀝飄簷密雨應如  
麻卻驚皎潔眩銀海乃見紛紛飛玉沙人日凝陰歲所忌得

雪或者爲祥嘉麥性土膏足醞釀但恐宿草摧新芽冷趣暫  
饒野客領清詩欲向良朋誇乘興未放剡溪棹沁脾且烹陽  
羨茶百年如此不虛擲何知轉瞬當辭家此去燕臺二千里  
月苦風淒天一涯

夜往常熟

夜向虞山出葑溪參旗落落挂天西市樓臨水燈猶密津樹  
成煙路欲迷暫往情懷思鴟退勞生蹤跡羨鴉棲舟中有酒  
仍嫌少一飲何由醉似泥

別貸園梅花

羣雀啁晴曉梅開向南枝精神迴珠玉園樹皆生姿瀕行始  
一見對影臨清池不悟客行速但惜春信遲此去到江北  
花猶及期恩恩豈復暇卽向黃河湄枯蓬捲颯颯宿草披離

離前程雖所慣暫感良不怡愧彼孤山士花前長賦詩

錫山道中追和內子送行詩韻卻寄

氣到中年減光從上國觀三杯成曉醉一艇溯春寒干祿書  
難讀登科記任刊全家能卻粒便擬學劉安

過荷花塘二首

俊風寒日向秦郵淮水中間忽倒流斷岸人家茆屋險可曾  
相約上扁舟

截截蘆薪積萬堆荷花塘外殷晴雷淮流應識長江路流到  
塘東合便回

順河集三鼓發

隔窗聞馬鳴起視明星爛閉置車帷中何時夜方旦奴子旣  
告勞居人亦旁歎謂此過客廬去來多夜半

乾隆庚戌三月過東阿舊縣項王墓曾作長古弔之  
今湯笑山春余鑑堂紹元同行薄暮偕至墓所低徊  
而去二君有詩亦依其體率成一首墓在亂山之麓  
去舊縣里許

羸顛劉蹶總天亡廣武何勞弔戰場據割儘容雕結尉驅除  
先惜夥頤王彭城野草迷江碧魯甸殘山遶墓蒼擲去頭顱  
千古在爲公立馬看斜陽

二月十二日夜發東阿舊縣憶去年今日郭頻伽趙  
良甫置酒作花朝與諸子分韻賦詩之樂

風信淒迷換酒人恩促行好春花未覺良夜月無情撲蝶思  
吳苑聞雞過穀城往年吟社客今日可尋盟

交河道中

夜半交河道登車倚宿醺白煙濃入樹昏月散成雲馬力誰相惜雞聲我獨聞曉寒應漸減已是過春分

從家蘭茗秀才及康龍山郎中處折杏花梨花各一枝以歸供之杯水因以發歎

江都姊妹同衾宿夜半相呼剪殘燭傾城顏色心自疑如此春寒住茆屋陸家兄弟同室居風貌可憐玉不如紅衫白袷瘦相倚風雨刺促交蘧廬燕子不來春已短紗窗一夜落花滿何必高樓吹玉管

移虜國祥寺復見海棠對之成詠

微微花氣本通禪合種維摩丈室前久耐淒涼供佛笑爭知飄落被人憐重簾欲護春應許高燭相看夜忍眠亦是閒情禁不得未妨呼作海棠顛

閨中有憶看花之遊題壁寄劉芙初庶常

城南看花花欲笑有似春人話年少城北看花花正愁有如  
怨女凭妝樓紅玉闌干白玉墀花光欲照無清池亦如明鏡  
委蛛網十年不嫁羞畫眉劉郎妙語挾天髓欲以垂楊代流  
水焉知花影蕩成波困怯纖腰眠不起故青新綠分淺深春  
殘何處是芳林歲歲妍華千萬種東風開落恐無心

覃溪先生贈詩期以上第次韻奉酬

拜筆歸來近二旬昆山片玉屬何人論文忝侍宗王久待詔  
叨題吉語新東壁圖書窺未得南宮風物畫難真看花縱好  
非年少曾送長安兩度春

寄贈湯茗孫明經

儲璠

二首

句必裁花骨情應奪月魂香栴同故里玉茗有名孫暫接東



華轡遙懷北海尊

茗孫時客於陳竹最殘仙洞集先子正公

百卷守業愧通門

清澈汝川水滌洞蓄妙才文章曾咎盛風運再誰開洗墨添  
新沿繙經葺舊臺江湖心枉在期子上蓬萊

爲陳舉秋秀才題畫海棠便面

走馬何人到碧雞長安花盡草萋萋筆端畱得春姿在不逐  
殘紅入燕泥

題楊青所畫萬花春谷卷

并序

楊青不知何許人筆意類仇十洲卷長丈許畫仕女百人  
人長寸許裙底皆出弓足蓋畫家之能品矣大興翁星原

秀才

樹岷

所藏

誰宴瑤池遊玉京誰登桂府夢蓉城花光玉色千娉婷各抱

瑤想絨瓊情畫工造意能通靈一一收攝歸丹青朱門行樂  
寧有程樸擬約略難分明或彈瑤琴吹玉笙或戲金葉談楸  
枰或聯畫舸掉錦湮投壺秋千雜技呈門雞鬥草爭輪贏書  
格畫理交品評慙者調鶴癡調鸚看蝶舞花魚唆萍花面鴉  
頭供使令青衣亦有蘭麝馨此皆豪侈成驕盈毋乃貪癡相  
合併珠幌試窺魂魄驚就中畢竟誰尹邢彩雲不傷織女星  
華芝瑤草殊跼莖獨立者依竹亭亭獨眠者欲噉黃鶯香塵  
繡幙誇體輕焉知房老無笑聲卷終紅女繡不停似存諷勸  
分淫貞孰敢爲此嗟楊生客竊獨坐當午晴孤懷惱亂虹霓  
屏羣女欲下通姓名迷離倦眼夢耶醒微風別院吹金鈴捲  
畫一笑春冥冥

四月十五日屠琴塢大令

倬

招同顧南雅

範

董琴南

劉英初刷三太史吳蘭雪國博書梁沈小宛

孝廉欽廟齋小飲各咏瓶中芍藥三絕句時琴塢

以庶常改官予與蘭雪小宛俱罷春官試也

謫瑤臺露未乾一園金帶等閒看莫嫌開在春風尾猶勝

梅花傲骨寒

泔態狂香對酒卮花名何故號將離黃雲低壓窗風緊正似

銷魂握手時

十二珠簾六曲屏容華絕代總飄零買花也欲畱春住先少

閒錢市膽瓶

送李蓮孫孝廉培歸臨川用寄湯茗孫韻二首

郡郭南湖寺頻年引夢魂曾因吳季子謂快識李王孫謂

翠搖詩筆荷珠瀉酒尊往時離別感牢落更金門丙辰秋余赴潮州過

鄧城蓮孫與余始相識餘余於清風門外開元寺曾作南湖秋餞圖

舊社疎吟侶

謂陳承門會賈亭諸公

虛襟佇異才上林千樹合歸路幾

花開水竭張融宅金封郭隗臺此身無著處慙愧故園萊

耶溪漁隱詩爲琴塢作四首

花飄越客千絲網月在耶溪一葉舟  
未要樵風朝暮送溪南溪北是安流

壯心飛向浙江潮笑脫青蓑上碧霄  
騎鯉琴高新見謫飛鳬葉令可能招

漁弟漁兄豈世情貪閒亦自誤平生蘆花淺水無魚釣竹箭  
奔流放棹行

君家東浙我東吳已共三江又五湖  
至竟嚴公傲候霸靈芝笑西子笑陶朱

謝思元主人惠畫梅便面及楹帖贈句卽以畱別二  
首

雪香雲藻落瑤窗拜賜珍逾白璧雙  
妙草千秋傳篋笥寒花何日照磨幢  
光生台斗宜懸壁氣壓蛟鼉好渡江  
吳越山川待高詠願飛彩筆到南邦  
車前未敢姓名通馳使招邀荷上公  
事隔七年駒過隙詩畱一紙雁橫空  
仙才李白原宗子文體蕭良自古風  
東閣正開還獨去驛亭回首五雲中

畱贈洪介亭編修

占鑑

二首

昔年附羽翼所志俱雲霄中路忽殞放君已凌飛  
瓊丹臺萬象闕絳節羣仙朝閒倚白環樹孤吹碧玉  
簫垂眸見故侶舉手欲下招燒丹未有訣守素空無  
聊至道本平等太虛無近

遙蓬壺亦下界頭上雙丸跳

歲月旣竝馳伊誰獨長久蟬蛄入豪翰乃比龜鶴壽西清著作林東壁圖書數史筆嚴風霜餘才散花柳雖防雷電搜豈奪鬼神守君職諒能修我心每自誘林屋藏異編輶軒遲良友異遇實同師

介亭與余同年貢太學出潭溪先生門下商量其不朽

無題效義山五首

楚楚飛蟬插鬢雅晚妝嬌比壽陽花巷嘶北里迎郎馬門過東鄰娶婦車月下老人空撮合雲中仙子久咨嗟西施底事曠眉黛不爲傷春爲浣紗

春在誰家七寶牀鳳窠雲隊散輕香幽蘭自許紉爲佩明月何緣取作墻夢冷班姬執扇裏愁縈蘇蕙錦機旁幾曾畱下相思枕爭用臨風枉斷腸

柳眼花顚解事年六親初見訝如仙錦江拾翠遲迴出繡被  
薰香宛轉眠紅拂改衣尋李靖綠華偷藥付羊權分明載在  
鴛鴦牒始信私期也夙緣

碧海原無萬里橋珠簾不捲便迢迢釵飛玉燕春聲斷鎖合  
金蟾夜色遙隔院小桃貪結子緣階香草倦抽苗月宮姊妹  
驂鸞舞誰與嫦娥破寂寥

歸來休唱繞梁歌趙瑟秦箏妙曲多同伴有情呼鬥草侍兒  
無力嬾牽蘿閒拈繡線酬窗影笑倚銀牀問井波顏色自憐  
羞自照十年妝鏡未曾磨

往平次小苑韻題壁并示朱苾園孝廉

芬

燈前聞唱定風波又泛虛舟入愛河對酒客如明月好彈箏  
人比亂雲多登車便隔迢迢夢埽壁還書踢踢歌寄語一雙

雛燕子高飛早避北山羅

東門至東平二首

漢魏分藩地車箱一谷通土鬆黃蘗雨天冷白楊風躡馬三  
更後披裘五月中阮生休入世容易哭途窮  
坊額誇州里雍熙老狀頭空居顏駟署不醉杜羔樓矮屋消  
奇氣狂塵汨壯愁渭川千畝竹原可薄封侯

兗州

泗水橋頭水橫流斷馬蹏遠山蒼入地斜日紫成泥芥渡堂  
堦闊花飛洞口迷螳封盤旋久猶在魯城西

界河驛

亂石險於波嶙峋出界河廉棱森劍戟頑骨蛻鼃鼃近借蒙  
山勢中分魯道頗下車且安步嶮巖復如何



雨夜至南沙河二首

時雨行人惡陰雲暮野生河聲麤帶石桺路暗包城遠火流  
螢閃前車斷雁鳴迷途緣底事太視此身輕  
心非鉗鋸熱身等轆轤旋小劫茆亭雨新愁土銼煙呼茶先  
止渴攤飯略成眠今夜雖如此吾生只偶然

野宿官路口次日至小順河集題壁二首

失路無康軌連朝若野屯黃沙期待渡赤谷暮投邨齧餅眞  
蹲市求漿欲啟門但教歸計得坎壈不須論  
計吏偕原誤綱官誚亦癡歸心黃鳥急舊夢白鷗知望嶧秦  
碑杳過徐楚水悲熟眠醒午店梁飯又將炊

和小宛淮陰侯釣處

長樂鐘聲萬古沈釣臺依約尚淮陰懷才早得磻谿玉報德

寧虛瀾水金說客知幾會相背史公作贊已原心鉢池山下  
多漁父一曲滄浪暮靄淡

寶應道中阻淺次小宛韻

宿宿歸舟滯年年暑路艱有聲趨開水無影隔江山燕引心  
旌風蠶鍼指節殷拓窗聊晚眺湖月又如環

高郵道中懷秦少游同小宛作

孟城山遠抹微雲淺水孤舟又夕曛小石調工傳錦瑟古藤  
陰冷哭紅裙揮豪對客今誰似舉酒屬君應尚問亦記文游  
臺上醉七年風雨感離羣

癸亥秋與同人送曾賓谷都轉  
入覲飲於文游臺雨中握別

將至揚州追紀近日行道之苦

雨雲散裂成蒼狗三日南風作虎吼兒童攬袴橫流走乞水  
須決長淮口牽船岸上不可住緊峭芒屨觸熱去十里一蟬

噪孤樹道旁苦茗勝甘露竹兜乘月趨秦郵湖風砭骨涼於  
秋野寺天明買一醉復提酒餅登小舟小舟雖小能趁流大  
船尚閣泥沙頭勞者且歌莫歎息江樓隱隱聞吹笛隔岸晚  
山青厯厯

丹陽萃秀橋見漁者

橋外水灣環漁人藉茅坐密網黏細鱗魴鯉衝流過施張非  
不勤得小遺其大焉識釣鼇客投竿正高臥

漫與

此身何所似緘札報夫君瘦影池邊石僑蹤嶺上雲名輪前  
進士夢覲故將軍萬事付閒寂風吹庭草薰

嘉樹園在居宅之後方廣與貨園埒樹石蒼古不逮  
而花徑夷坦過之園有小樓拓西北兩窗可以望遠

行人居女俯在眉睫間野水平疇雙柳拂簷大有郊  
居之趣向以荒僻舉室稀到近乃埽除施設時一凭  
眺輒忘此身佳闌闌中矣爰顏之曰郊趣它日當寫  
畫手圖之也

小園西北有高樓舊說仙人住上頭久寂凝塵教婢埽飛來  
佳句要儂收柳容映水明初霽稻色成雲報好秋曲檻疎簾  
同徙倚全家道勝虎山遊

影心亭晚坐柬姜曉泉處士

壙二首

檻外清池鏡晚空冷吟分付木樨風遙知獨坐倪高士也說  
秋心向碧桐

曾畫朝雲妙入神更畱佳句寫酸辛與君各在西風裏都是  
天寒袖薄人

黃貞女詩

妾生十四歲身許朱家郎朱郎先妾死來上朱家堂殞身復  
何待揆義存勝亾妾雖未及醮昏禮循其常郎殤乃有婦於  
義可勿殤爲郎立姒續爲郎事尊章郎生所缺憾一一爲補  
償又經十四載始得依郎旁郎魂在何許宜在堂與房所愧  
相待久郎心宜見諒重泉作伉儷白首無此長墳頭連理樹  
上有雙鴛鴦路人共歎息

朝典將褒揚朱生名則瑋貞女父姓黃旌德兩士族千載同  
輝光

十一月初十日大雪陪德餘堂都轉及同舍諸君宴  
集春榮堂堂卽舊題襟館也酒闌賦此

勁風中夜停晨雪齊階積彌空勢愈浩寓目光相射嘯侶升

崇樓呼僮埽磐石一氣連江濬萬家迷屋脊於時冬未半欣  
此瑞盈尺五版報臺司重簾閤主客小部嬌吳飲深杯戰楚  
席冬令頻歲愆農憂此度釋矧茲舊賓館獲繼前遊跡雖無  
禁體詠頗有忘形適豪寧計觥籌曠欲脫冠幘籠鶴警清晝  
林鴉噪朗夕卻念貧薄人政爲飢凍役高寶方斷流淮徐鮮  
宿麥我身亦暫康彼土或仍瘠豐荒無定程聚散靡常格歡  
宴忽已終凭闌悵今簪

臘八日還至吳門晤五舍弟卽送之歸臨川

旅跡成磨驢歸心等柙虎戊旦渡南徐癸昏達東楚舍弟驚  
出迎慈親喜相撫淚傾離合因情亂紛紜語中廚臘粥冷入  
夜風燈舞溫酒話鄉閭圍爐忘譙鼓荆樹旣分條桓禽有摧  
羽四舍弟以七眼看吳會雲淚寄襄陽土歸骨彼何由愴心

此奚補手足貧乃渙親鄰會方阻君計須遄歸我懷遑盡吐  
眞樂非笙鐘至榮詎圭組矧茲萍水寄焉及枌榆處霜飄鳴  
布帷冰月炯沙渚前途尚愼旃到日堪遙數

冰池

凍合長河作廣途小園池水亦銀鋪昂頭已隔潛游鯉側耳  
無煩汜濟狐殘月斜時猶洞澈濃霜積處轉模劬旁人錯比  
襄陽鏡能與梅花照影無

歲暮感舊詩五首

并序

今年交舊殂謝滋多陸生歎逝杜老懷賢不能已於辭矣  
各繫一詩以歿之先後爲次

尤二娛大令

維熊

記訪青楊巷

二娛居吳門蕭家巷

心推耐久朋偉才原沈約豪氣尚陳

登文字緣何晚襟期話未能彭宣君夙契

謂甘亭

來共感寒燂

袁綬階文學

廷壽

識子貧遊日當年乃素封千金緣客散十載以書傭古槧零  
星失清交解后逢酒壚同醉處淮水尚溶溶

洪稚存太史

亮吉

孝德名卿

謂畢秋帆尚書

重狂名

聖主知心傷下鏡日身隱

賜環時詩筆高岑後文情魏晉遺傳家雖令子

謂孟慈

終切老

成悲

蔣蕩船大令

知讓

一宦無歸日同聲惜異才張劬仍隔夢孫楚倍含哀誰輯如  
山稿空登挂劍臺平時多手札在篋忍重開



制府阿公雨窗

林保

正倚綬南國俄驚落大星  
角風悲送響旗日慘揚靈材  
館昔容接神途今杳冥  
野人知己淚遙向白門零

園松四株爲雪折其一幹

貨園四松各千尺力排雷雨久無敵  
如何昨夜戰玉龍左股傷摧鱗爪  
墜我借園居逾兩年園中草木皆  
所憐松爲木長又奇拔清耳風濤來  
半天此幹敲陰覆池水池心積翠浮  
空起一朝偃蓋壓低檐凍魚驚躍  
層冰裏四松竝是棟梁材一幹能挂  
凌雲臺細看臥虬鼓蒼鬚生氣猶  
畫頑陰開卞和刖足睢拉齧踉蹌  
高空邁小劫少陵莫爲草堂嗟萬  
木經秋改枝葉

青芝山館詩集卷第二十

臨川 樂 鈞 元淑

古今體詩

庚午

元日立春夜飲得句

春來未來渺何許  
半日天晴半日雨  
光陰如客客如夢  
不信全家是羈旅  
燈明酒暝又今宵  
笑聽兒童作失語

送四兒少英入學

汝以兄爲率  
汝以母爲師  
汝兄勤可效  
汝母通文辭  
憶我入學始  
亦當七歲時  
因循至老大  
欲學嗟已遲  
汝雖幼且魯  
蒙養今其基  
銖寸且積累  
秀頑寧預知  
百鳥異毛羽  
飛翔皆可期  
長林秀萬木  
各自成柯枝  
我嚴汝或畏  
汝母導以慈  
祖母

憐汝極愼無倚嬌癡

春陰

春陰漠漠緩琴絲冷霧霏霏  
涇池消卻江南春一半梅花  
如夢未曾知

往揚州將發口占

剛得吳天兩日晴風吹鳥語作離聲  
年年盼到園花發都被  
春寒送出城

舟過齊門

齊女臺邊月漸昏船燈楚楚近閭門  
分明一片追歡地不是  
遊人便愴魂

轉盤行

一盤象荷葉一竿侔竹箭  
竿在人手盤在竿仰空似有風輪

轉竿下顛倒兩銅刀刀鋒相接纖如毛下刀仰承上刀動不  
脫不墮爭釐豪大盤旣收小盤出兩竿兩盤轉如一荷肩繞  
臂頻出奇越膀迴腰百無失最後兩盤畱一盤兩盤猶易一  
盤難首下尻高捷一轉竿仍在手盤在竿吁嗟險絕乃絕技  
觀者前驚後則喜往時所見俱等閒今爲斯人歎觀止乃知  
百藝貴專習精妙入神難企及欲訪宜僚向市南前階雨過  
蒼苔溼

春愁

春愁如雨散無邊春夢如風去杳然乍雨乍風春日日時愁  
時夢客年年迷離花影飄殘醉懊惱禽聲鬧短眠已信如今  
非杜牧鬢絲猶自颺茶煙

寄內

庭草庭花風日和知君清課近來多應薰古帖成蘭麝亦繡  
新詩上綺羅此地消愁憑蝨簡常年作客愧鷗波嬌兒可是  
遵孃教別後經書讀幾何

同胡鶴泉金手山淮陰柳衣園看花口號

湖水灣環綠進城碧蘆風起送船輕猶堪照取遊人影比似  
淮流略有情

得家書知吳門廨宅爲有力者所奪移居廟堂巷矣  
作詩二百言以慰妻孥

夢繞鋪簾水心憐照榻花孫郎曾借住杜老又移家魯本鳩  
因鵲今同鶴避鴉重尋宮一畝小立路三义近市應難擇遷  
喬亦浪誇兩間皆逆旅何處足浮楂第宅吳兒侈街衢茂苑  
斜巷淡迷落日樓迴納朝霞玉琢盃常破金藏穴易窪畫檐

閒門雀珠拱壞盤蛇桑宿休生戀蓬旋未有涯且鄰沽酒店  
聊歇載書車蜀舍名堪守陶廬願詎奢有庭姑種竹無地不  
宜瓜比戶多僑舊營巢各歎嗟居人猶泛梗客子況搏沙不  
滯師雲將相隨感月華慕羶惟蟻國成蜜自蜂衙葢屋茅爲  
瓦障窗紙代紗雖無亭館勝漸可見楞伽

後煙夢詞疊前韻十二首

并序

暑窗稍暇孤悶不紓適李玉坡孝廉以所和煙夢詞見示  
有觸於懷因再作十二首意以懺前作也嗟乎鴻爪遺痕  
鵲唳故血風亭月觀之間所在多有愁香怨粉紛紛集豪顛  
旣悼彩雲亦傷墜雨萍身橋性彌感中年懺云乎哉然琅  
邪欲死洗馬欲愁今簪滋異玉溪生其知我乎當無復繡  
帶羅衫之謂矣

舊恨拌隨豔雪消餘情時逐冷煙搖埋香幸占繁華地酹酒  
爭過宛轉橋雨滴懸鈴疑怨咽霜生明鏡感飄蕭九迷十索  
詩耶夢字字都能瘦沈腰

夢裏芳魂不再逢蓉城豈有妬花風香絲斷帶三分碧燈穗  
殘餘一燼紅萍絮輪迴無去住燕勞蹤跡本西東年來未覺  
辛兼苦滋味依稀似夢蟲

孟姜猶憶賦同車環珮淒清響赤瑕湖水香時蘭作槩城煙  
綠處柳排衙傾心旅客情原錯撒手塵寰計未差莫怨濃霜  
摧豔蕊縱開應是斷腸花

空製同心七寶釵幾曾看著合歡鞦年來年去驚花信情死  
情生付酒懷枉管已同居士疾如今漸比太常齋安神自是  
閨房好長統憂難地下埋

扇墜香囊忍棄捐詩中信物畫中緣玉鈎斜土傷前代金縷  
衣歌負少年紅豆相拋成墮落青梅未熟枉勾圓迢迢最是  
高唐觀知在雲邊在雨邊

楚楚羅襦貼鷓鴣垂垂翠帳掩流蘇酒人爭解傷心曲畫史  
虛描背面圖乍見柔情多滯膩淡談要語轉含糊十年看徧  
隋隄柳不遺花飛有幾株

不記山椒與水濱不知鈿合與釵分三生何處同看月一夢  
當時早化雲愁緒遍縈香絮枕淚痕多驗石榴裙伊誰果踐  
雙棲約會有同林宿鳥聞

紀事重將片紙伸阿誰強笑阿誰頻錯聽綠綺求皇曲都作  
青陵化蝶人弔影可憐招蕙歎聞香便算了蘭因紅牆題句  
知多少紅袖曾經與拂塵



莫訝花辰懶看花料無紅線綰春華揮愁擬借延平劍學道  
思求勾漏砂玉已長埋同瓦石琴猶罷撫況箏琶不知巷曲  
城彎處今日歌樓尚幾家

紛紛綠意與紅情誰把相思判重輕呼婦鳴鳩常反覆罵人  
鸚鵡太聰明枝枝鬢朶須珠綴對對眉梢有黛橫春到五分  
容易透小梅未放莫吹笙

蕙幄蓮船倒玉尊山香才舞燭花昏愁來早抵三分醉病後  
能消幾次魂薄命未應疑月老離居先已負天孫五湖范蠡  
終難學欲效龐公隱鹿門

猶慙綺語未全刪畫自垂簾夜掩關往事追維如隔世詩人  
憑弔爲韶顏墳頭久宿紅心草江左平添翠黛山更作新詞  
酬舊句何曾懺業祇消閒

蘭雪國博奔嫡母之喪攜家南歸過邗上月餘乃行  
作短律三章送之

宦爲談經拙歸緣賣賦遲才名諸老惜旅味一家知隄柳牢  
牽艇江蒲冷泛卮窮途何所似飢鳳失巢時

泛宅方憐我臨流又送君分襟淮左樹寄夢汝東雲去日同  
金擲今生悔麝薰瀟陵歸路晚還有故將軍

出處俱風絮窮通只鏡花仙人騎鶴笑神女抱琴嗟夢醒天  
猶月愁空海不沙法華難便轉且可讀南華

六月廿六日移家揚州題南柳巷新居二首

連歲吳中米似珠淮南米價賤於吳全家又鼓浮江楫每月  
平添賃屋租暑雨過時剔苔蘚秋花缺處補護蘇高齋不爲  
移居換

少陵居夔三徙  
居皆名高齋

仍挂青芝舊館圖

客舍迴旋已十霜今來不算是他鄉  
天文本自同牛斗禹跡何曾畫土疆  
風俗應隨人變易湖山亦似我積唐  
章門歸路無多遠西望江流一線長

建隆寺懷古

夾馬營生宋主大儀營受周虜  
鼾睡不肯容江南肯使柴家  
畱寸土孤城旣破舉族徇周  
室懿親李重進提頭下見周  
世宗猶佩淮南招討印不及  
劉旻係漢疆淮南形勢殊晉  
陽韓通李筠足同傳周有三  
臣周末亾九曲池中龍門捷  
欲學蕭公懺往業銅像曾銷  
顯德年空門亦有紅羊劫建  
隆寺耶彰武殿不見御容見  
佛面西華舊址土花斑疑有  
當時斷刀箭汴水洶洶淮水  
平道君復此逃金兵循環果  
報斯奇絕豈獨婆畱索兩浙

題王子晉緱山跨鶴圖

青樓碧樹搖天風天邊絳節排玉童  
仙人與世暫相見鶴性如雲無眷戀  
玉笙一聲人盡聞餘音已徹通明殿  
可憐八駿辭瑤池西野三年空復期  
靈根妙氣發神葉真得浮邱爲導師  
阿妹娟娟兩天女同騎嬌鳳朝紫府  
何物六郎誇後身相呼相伴一鸚鵡  
頑骨須臾化黃土

中秋酒後

連朝雨洗長天潔風剪雲花散瑤闕  
秋到今年更有情全家來看揚州月  
老親歡笑稚子譁茗煙花影搖窗紗  
人生樂處皆良夜何必金閨有月華

書張子貞後塢村居圖後

卅年飽飲邦溝水一髮故山藏夢裏  
故山何在在歙州三十

二峯接雲起山邊後塢君所居長松尚繞先人廬菜花黃過  
稻花白門外東阡復南陌門中往往歇廚煙來賃康山山下  
宅清吟妙繪追古人刻石鐫金尤入神襟期磊落意蕭散藝  
不輕售家仍貧我亦浮家淮水濱昔爲朋友今比鄰此義非  
疎亦非親眼看物我皆游塵重樓複閣連花柳問有幾家曾  
世守他鄉故國總蘧廬一笑同沽花市酒

辛未

正月廿日三鼓邵伯鎮夜發

春氣微微破積寒夜光的的照征鞍四更缺月穿林出一望  
重湖似海寬燕市又循前路去揚州便作故鄉看何曾更有  
升沈感已向東風淚暗彈

在平旅夜見壁間舊題續書二首

遊蹤到處只堪驚風又淒淒月又明重讀舊題塵滿壁碧紗紅袖兩無情

或通或介人皆詫非夢非真我自疑若住江南風信裏此情應有落花知

萬柳堂補柳詩并序

元廉埜雲右丞有萬柳堂國朝馮益都相國因之今傳廣渠門內拈花寺卽其故址榛莽久矣昨冬朝士數十人爲補栽柳樹千餘株總其事者畫史朱埜雲鶴年也諸公競賦補柳詩余亦繼作

樹以柳配花花無柳不韻又以柳寫風風無柳不俊一堂萬柳環此景世尤僅馮園繼廉園縷縷輕煙潤人往地亦蕭然年曠春運遺基故可懷況在都城近衆志還舊觀風花氣一

振爭分柳宿光同探黃金信益都秉軸時文彥交驂靳諒非  
樂休暇勝賞其追趁景慕良有由豪華詎足訓他日位公卿  
賢才當薦進

劉芙初編修招遊萬柳堂二首

客舍草未青都城春欲暮聯轡尋古蹤積垣夾廣路土山氣  
蔥鬱蘆港光迴互規園可百弓列柳曾萬樹當時元輔居勝  
日名流聚覓句弄垂條流觴趁飛絮地變空王宅名餘後賢  
慕并力挽風流遙心寄煙露佳招荷故歡隨意領新趣宴遊  
無古今時運有來去

好事朱山人雲野經營出心手兼栽四序花雜映千行柳金縷  
未拂衣紅英已泛酒雲水自相媚燕鶯亦來友江南煙景繁  
淮左流連久湖山熟懶看風月散無偶茲遊殊偶然反覺未

曾有因之觸舊懷未免屢回首春陰覆城堞斜日澹樓牖遠山送客歸嘉樹煩僧守

越日赴阮芸臺侍郎之招復成二律

地僻公常到花新我再遊春從閒處領水自盪時流嫩綠添千樹遙青聚一樓好賢如相國廢圃有人修此日英流集尊前半舊歡過來俱刺促迴望卽迷漫樹億隋隄裊山憐建業蟠江南有歸路未許戀長安

次韻酬上官篠山孝廉

豫

旅鬢雪將侵猶攜舊撫琴酒闌餘壯氣天末見同心神可千秋合交原甘載淡沈遵偏好事還譖醉翁吟

篠山本余從甥近承執弟子禮

篠山將還金谿再次前韻送之

行色催風笛離聲委玉琴升沈皆失路去住且隨心燕雁時



相左魚龍水各溪鄉鄰如問訊莊舄尚哀吟

次韻酬趙兼堂明經

達善

漫士無專居勞人鮮安步天風吹野雲一散不知處幸承地主賢

謂尹厚圖員外統福

三月其君住逸禽欣對鳴鶩馬感溪顧文憑

尊酒論心倚窗燈訴臨岐荷至言永矢香綈護

旌德朱鐵庵

則璩

苾園叔父也寄詩爲贈次韻奉答

筇屐徧黃山攜雲滿袖還笛聲松月下詩夢石泉間好句驚魚躍勞生愧鶴閒恩酬遠意高跡悵難攀

程松門畫王漁洋煮泉圖

記酌涕南泉清甘沁喉齒因味新城詩與泉正相似茲圖公所遺石銚煮雲髓畫者程松門松濤聲滿紙簪公判揚州但飲虹橋水茶鐺茗碗開得此詩弟子三昧叅唐賢落花送尺

錦堂徒貌公象以畫傳詩曾帶經集重鐫風義況無比尺幅  
從淵源香綈護有以十載三賢祠揚州三賢祠祀歐蘇及先生也薦菊申仰  
止歸夢廣陵濤天風發吟几

俄羅斯鐵燈歌呈謝思元主人

鐵燈四片緘鐵篋光比鍊銀薄如葉中間面面嵌玻璃用卽  
可舒藏可疊貴重似宜燃豹髓虛明乃足見蚊睫風起無愁  
粟滿囊月斜未覺煙浮鍊此器云出俄羅斯泰西製作同精  
奇主人臨別出相贈何異東壁分餘輝卅年心事短檠知擊  
鉢高齋曾賦詩如今對影自笑癡坐聽星斗空中移火樹銀  
花千萬枝洛陽巷陌終迷離歸憑寶炬照昏黑燈婢燭奴黯  
無色但逢良夜卽清遊不問花南與水北

祭硯圖詩爲朱野雲

鶴年作

邀福於神或不享乞靈於石報無爽石本頑物胡能靈斷之  
爲硯應如響珠玉闌干墮几席煙雲頃刻生書幌鳳味銜花  
春倍妍鸛晴貫月夜逾朗或言人靈非硯靈人心與硯通神  
明不幸遷流落庸手硯仍頑石靈何有支牀斂井亦尋常但  
願知己毋相忘無田有歲伊誰力硯台侯封封卽墨朱生妙  
繪天下傳歸功於硯硯曰然祀歲家家敝几筵獨君拜石師  
米顛石旣爲硯斯爲田焚香爇燭供清泉此外配享惟三賢  
楮生毛生及陳元酒脯祭詩賈闔仙精神無補徒可憐

畱別都門師友二首

長安春事又飄蕭花已狂飛柳獨搖何物有情禁夢想此間  
無地著漁樵賸將苦語添詩帳拋卻良辰爲酒瓢紫陌歸來  
年少客黃昏鞭馬上河橋

城頭颯颯紙鳶高屋角蕭蕭鐵馬號窮負韓門憐賈島狂容  
嵇老仗山濤歸帆卸後書難達使節來時望已勞未必江湖  
能穩住蹉跎一樣鬢刁騷

夢醒

夢醒疎櫺月向低何曾高嶂有丹梯情多未化莊生蝶耳冷  
偏聞祖遜雞昨夜星辰猶燦爛此時花霧太淒迷重門不啓  
金魚鎖要待流鶯繞樹啼

有馬

有馬能服箱安行足不失廐中無驕驕此卽空羣匹一朝倒  
路旁造父泣三日吁嗟淡穩氣竟以馳驅畢

富莊驛見亡友蔣蒲船大令題壁詩

十載不見君知君苦職役會面方謂長交期倏已畢聞君作

令初

唐君宰唐縣

邁疾腫腰膝遷延逢上醫痊可限時日負券既追

呼長官孰存恤生死須臾間以貧不以疾燕趙交衝途風雷  
墮荒驛車鐸聲乍停簷鈴響彌慄細觀壁上題驗是故人筆  
銜憂爲官錢湧淚入詩律君非百里才因此七品秩奇氣一  
朝盡前程誰敢必

自平原入開山汎作同劉芙初編修

泰山自是羣山尊能出雲者皆兒孫其餘硯石何爲者毋乃  
戾氣叅胚渾虎豹磨牙踞當路車不能前石猶怒欲乞山靈  
賜鑿除山霸大笑君言誤君家本住大江湄一舟來去隨風  
吹胡爲遠行涉此苦曾不自嚙嚙石爲中天赫赫停炎曦行  
路之難寧未知

張夏夜發

雨雲中夜冪星河一鏡天邊黯未磨  
撲馬征塵今又起棲禽老樹已無多  
前山狹似車箱谷碎石紛如彈子渦  
歷盡險艱仍不悔且看岳色近如何

敖陽道中

旣雨猶炎熱經過十二程因風憐燕羽  
近水得蛙聲月暗星逾大山低路未平  
柳間聊憩息蟬噪只無情

同英初由楊家莊渡河至清江浦幸而獲濟

一舸橫風濟怒流單車尋路向揚州  
適來或遇婁師德平日原希馬少游  
江左鶯花宜送老竹西歌吹亦消愁  
此身不葬黃河北處處青山是首邱

夏曰雨後晚出揚州西門

滯舫西郊雨吹衿曲徑風萍爭新水  
綠花讓夕陽紅暮色蟬

聲外涼懷燕影中閒園誰是主欲問釣魚翁

論詩九首和覃谿先生

蘇齋論肌理扶輿示學徒傳心在法外手捻牟尼珠施姬豔  
絕世玉貌花爲膚健兒氣如虎筋脈寧有殊松老秀鱗鬣外  
榮中或枯百花不同態分別由根株靜者會衆妙氣充神亦  
符相觀在形色相馬得其麓師門愧授受精蘊難具摹

先生論詩

主肌理乙丑夏鈞將出都先生仿  
王介甫贈曾子固同學一篇爲別

六義聖所存其辭半箴諷楚騷漢樂府餘脈逮唐宋云何廊  
廟才專意學三頌昇平資黼黻此外疑無用吉甫與奚斯立  
言固鄭重非規亦非諛風雅相伯仲常憐揚馬儔文學徒侍  
從奏賦千萬言浮夸駭庸衆輶軒不采詩民隱曷由貢誰言  
幽谷鶯必學高岡鳳

精華出寸管但恐昔人有乞靈向陳編所得亦已後吟哦鋪  
典實毋乃落談藪甚者類跋尾神形兩不守此體創何年今  
然古則否篆歌溯鳥跡鼓文記魚柳數語助波瀾承流遂千  
首學士非詩人杜蘇不任咎毋以博溺心性情斯不朽  
通篇月露詞未免乏奇采濃雲羈怒雷景狀亦可駭被服各  
有宜豈必明光鎧溪澗清淪漣何爲變滄海由來神勇人舉  
鼎色不改滿紙森戈矛其圍固易解巨蛇摧蜀山破碎失真  
宰虛實剛柔間何人具神解

咏物殊賦物借題舒嘯歌描摹弄纖巧謎語斯同科荀宋寫  
聲貌濫觴乃積波與詩究畫境變體非吟哦後來雕蟲技形  
狀專揣摩胡蝶三百首雖佳毋乃多少陵黑白鷹雄氣今不  
磨翡翠飾蘭橈珠匹當奈何三年刻玉楮心力徒蹉跎



宣尼惡鄭聲胡乃存其詩雖云示懲戒讀者心然疑始信小  
序說非皆男女辭諷刺係邦國其言斯有稗後賢誤前注淡  
旨無由窺彭澤賦閒情選樓猶見遺腐儒剪香草華士選妍  
枝理障與情魔貞淫兩失之冬郎九竅香氣骨何權奇金荃  
信側豔亦寓身世悲忠孝無真語色莊徒爾爲

稱詩託大家有似侯門隸主尊身則卑趨走借餘勢將軍有  
揖客傲睨金張第終南壓其眉意氣自天際曹魏盜中原益  
州可自帝宋襄思主盟反受楚人制兵法師一心孫吳亦符  
契人才衆如樹何必盡松桂常味涪翁語不隨人作計異哉  
杜審言乃慮無人替

詩中苟無我其語當屬誰富麗千萬篇署名始得知譬諸公  
家物無主任挾持揭篋負之去何憑爭是非人生情與境隨

在不可移況乃立身命始終寧兩歧歌詩或不類君子以爲  
譏子矛刺子盾舉體皆瘡痍古人成一集可作身後碑優伶  
作啼笑觀者無戚怡

山無雲不奇水無波不廣蒸鬱成迷離澄清入浩蕩古人製  
作精後世豈能仿蘸筆來鬼神終篇有餘響自然非偶然積  
學加以養有似還丹成飛空出九壤平生苦頑鈍造語費凝  
想潛藏終刻露衆目易爲賞嘗慕化人居情馳身莫往何時  
升太虛俯看凌雲榜

秋日客運使解聽雨雜感七首

夜風挾秋氣庭樹皆怒鳴紙窗鬆以薄蕩作波濤聲黃淮接  
江海消息常所驚不寐對殘燭遠懷蘇雲卿避地東湖上種  
蔬了一生

草木昔曾記園林今罷過眼中無故物但覺秋雨多  
明月滿地成煙蘿往時蹋人影深夜猶嘯歌

市兒肩上花買插膽餅裏離彼根與株恃茲幾寸水芳心雖  
盡吐爲日亦無幾投棄榛蕪中春風吹不起松竹無豔姿眼  
前卽千里自有高人看何能媚窗几

王嬙恃顏色不肯賂畫工長門卽絕塞萬里無路通一去反  
驚衆光明畱漢宮至今舊邨女炙面毀姿容色亦不可恃容  
亦不可毀妍醜在君心宿瘤有知己

千絲繡一悅巧者嫌未工頑金鑄長劍勇士避其鋒畢世事  
篇帙化爲蠹書蟲仙字食不飽雕鐫傷寸胷此後五百年知  
音難必逢胡不學胡蝶死生春夢中

亂夢一何長佳夢一何短夢長終易醒愁長無時斷拓窗望

星月但見頑雲滿所思渺天南誰與達情欸溼螢牆角明燈  
焰搖孤檠衆人各睡熟衙鼓才四聲

中秋旣夜雨已分無清光異鄉值佳節歸奉老母觴恩恩不  
成醉病婦呻在牀燒爐煮湯藥舉室同憶惶人事固多累天  
時何所妨返遜獨客好雙眉猶得揚

陳受笙孝廉均行腳看山圖

蒼翠圍精藍縑流了無見峭鞋走城市兩目光如電君叅居  
士禪不著沙門傳浪跡常打包前身豈退院鴻心嶺月知鶴  
骨天風鍊氣爭巒岫高趣逐煙嵐變雲海沈青笠巖花落紫  
硯穿林叱虎逃摘果呼猿獻石鏡當眉清泉簾觸手濺雖殊  
采藥行頗有宿桑戀錫飛讓誌公塢合證曇彥馳神搜化宮  
晤佛造荒殿奇秀曾已足躋攀意未倦歸拋綠玉杖寫入烏

絲絹跋履曾朱門擔囊自赤縣登樓屋遮眼出戶塵侵面人  
境何喧卑世途難轉旋襟懷不得舒腰腳胡由健蜀岡秋意  
疲淮浦夕陽眩逢君倜儻來觸我登臨願壯愁銷客燈清興  
託談扇它時學向禽五岳須遊徧

前蜀王衍鏡歌爲受笙作

三學山頭聖燈滅三趙邨前子規咽半尺銅輪堆土花當時  
妬煞峨嵋月天雄節鉞委中涓中涓有婦君王憐鑄鏡親銘  
卅二字傳紅寫翠誇嬋娟照影可憐隔千里君王衷和巡天  
水鸞旂驟捲貪狼風唐兵已駐散關裏回鶻一隊恩恩歸宮  
人齊脫雲霞衣玉璽銅牌墮地失盤龍金鵲隨煙飛此鏡沈  
埋亦何有千年轉入書生手莫將小物論興亡金石片辭常  
不朽

趙健仔玉印歌

披香博士唾調水女弟來朝貴人姊貴人已佩金螭璽昭儀  
寵幸更無比綠囊書發皇孫死御史中丞印花紫漢京大寶  
久散亾婦官信物誰收藏刻燕作紐爲禎祥豈曾銜石墮續  
筐辨文應是出昭陽紅處似有脂痕香姊弟都由健仔進畢  
竟何人遺此印伶元班固多異詞片玉流傳或難信君不見  
鉤弋夫人初入宮氏號與此俱符同不知堯母門中物可在  
宣和印譜中

聞吳白庵卒於蘇州詩以哭之得五首

死當埋骨在蘇州

白庵句

詩識先從廿載畱未必精魂歸故國

只應仍戀石湖秋

左持酒琰右揮毫詩畫聲名晚益高罷舉辭官頭未白一生

奇氣吐青袍

同作醉翁門下士

與君同受知翁覃谿先生

仍爲廬巒社中人論交已久

論文細可是他生未了因

風雨相思半死生

余丁卯四月和白庵雷別句

淮南賦別各吞聲何知五

載音塵絕一曲驪駒萬古情

孤窗長夜雨瀟瀟舊館題襟燭影搖地下若逢蔣師退爲言

存者更無聊

篠山歸自京師下榻寓齋余旋有袁浦之行書以爲

別

歸客停舟訪寓公小庭吹盡桂花風吳天去路江聲外燕市  
前塵酒味中且放閒心隨野鶴莫將苦語訴征鴻他鄉故國  
都如夢知是淮南是汝東

秋杪從百菊溪制軍赴淮上舟行二首

忝應河陽辟多慙鄴下才戎旂聯客舫戍鼓接行臺秋老天  
逾潔湖低月易來水程風色好只少菊花開

大帥防河急輕舟獨早行水花閒見影雲葉墮無聲拓落諸  
侯客吹噓舊友情謂萬廉山自憐還自慶把酒看長庚

袁浦寓齋夜吟二首

殘月無光夜更寒莫因酒後倚闌干畱將薄醉成佳夢夢取  
瑤琴對客彈

譙鼓籠同晝燭明河聲嬾聽聽江聲黃昏一陣隨陽雁飛到  
天南弟幾程

奉寄菊溪制軍二首時駐蕭南李家樓

海疆已奠莫河防料得狂瀾更不狂方召殊榮光子姓九月



生上聞之甚喜賜名扎拉芬泉夔餘事到文章夢中捧日心常赤朝右簪

花髮未黃暫駐蕭南知瑞應韋侯封邑是扶陽扶陽城在蕭縣西南六十

五里漢丞相韋賢之後世封侯于此見太平寰宇記疑與今李家樓相近

旌節花前拜賜回柴門閒撥凍雲開禮羅曾忝烏公幕書記  
空慙阮瑀才幾日籠同喧臘鼓萬家指點上春臺鈴齋卻對  
彭門雪不向江南看早梅

### 寄萬廉山蕭南

積雪兼兩旬餘陰變零雨地偏風更寒念我遠行侶河患到  
荒墟茨防倚大府民舍屈旌旄官書雜塵土君著從事衫同  
聽迎年鼓勇已服王尊策應佐賈魯匪惟知己用實拯災黎  
苦毗贊雖云勞功名豈小補薦達由名臣褒嘉荷

聖主我亦蓮幕人歸來守庭戶國士能報恩野人何足數

十二月廿七日洪桐生太守

楊

招同吳穀人祭酒

錫

麒汪劍潭太守

端光

貴仲符觀察

微

蔣秋竹孝廉集

安定書院作消寒第三會同題石峯和尚黃山圖

夙聞黃山好蠟屐思躋攀讀畫觀奇勝臥遊良復難初疑鄧  
林樹歲久成峯巒又疑衛邱竹新筍排雲端石勢盡廉利森  
然不可干連延混一氣無隙容彈丸細看層雲上窄徑修蛇  
蟠明明此仙路欲往無羽翰山僧運靈輓貌出青巔屹毋乃  
畫禪幻虛空構奇觀造物豈有此阻人以險艱坐客笑曰否  
遊人常往還君果奮腰腳天都在人間聞言嗒欲喪自愧身  
骨頑天陰浩雨雪出戶愁嚴寒何當學曹阮絕頂燒金丹

擬范石湖分歲詞

消寒第三集

燭花香穗霏滿堂祖考靈圉來洋洋爐燒商陸焚都梁老幼

圍坐陳壺觴祝老人壽壽而康願兒童如庭樹長槩槩臘鼓  
兒童戲澼澼淡杯老人醉夜淡分歲還迎歲蠟爲燕子粉爲  
荔凍雨未滴天未明四鄰猶有爆竹聲老人自怕增年齒卻  
願兒童亦欣喜回思堂前總髻時乞果穿花正如此年去年  
來年復年老人如夢少如仙人人都道春無價試問春風值  
幾錢